

Presentada

MARTINO CONTU
Presidenti de su Centru Studi SEA

Sa prima di de mes'e idas, in su mentris si preparamus a serrai su numuru setti de sa rivista «Ammentu», su Centru Studius SEA hat arriciu unu billettù de Paulu Gentili, segretariu generali de CLACSO (Consejo Latinoamericano de Ciencias Sociales), cun sa sedi in Buenos Ayres, cun sa cali cun ufficialidadi s'hat comunicau ca s'associazioni nosta est istetia arricia comenti associada a CLACSO, sa prus manna accolleganzia de scienzas socialis apizzus de s'America Latina e Caraibi. Sa decisioni est stetia pigada sendu in cursu sa 92a sessione de su comitau direttivu de s'organizzazioni internazionali no governativa - associada a s'UNESCO - chi s'est tenta a Medellin, in Colombia is dis 3 e 4 de donniasantus passaus. Luegus apustis s'associazioni est stetia approvada de sa XXV assemblea generali ordinaria, chi est stetia fatta in sa propria zittadi, sa di 9 de Donniasantus. Su essiri associaus a CLACSO bolit nai pigai parti a medas e differenziadas attividadis e programmas academicus promovius de cust'organismu internazonali, cun sa possibilidadi de sparzinai is publicazionis de su Centru de studius SEA in sa biblioteca virtuali, una de is prus mannas in su mundu, ma puru de ddas bendi a s'esteru po mediu de sa Libreria Latinoamericana e caraibica de Scienzas Socialis. E in prus, cun sa oportunidadadi de sparzinai s'attivitadi scientifica nosta, cumprendius seminarius e atobius po mediu de paricius programmas presentaus de su canali televisivu CLACSO TV. Is studiosus de su Centru Studius SEA e is collaborantis de «Ammentu», si, de una parti, funt onoraus de esseri a sa parti de CLACSO, de s'atra funt zerrius a si pigai cuddas responsabilidadi accollegadas de s'associazioni e pigai parti a is attividadis e programmas de circas promovias de s'organismu internazionali. Essiri sa prima de is istituzionis scientificas italianas a pigai parti in su Consejo Latinoamericano de Ciencias Sociales in sa summa de casi 500 associaus de Istadus de quatturu Continentis, bolit nai poderai artu su sentidu de su doveri e de s'impignu, comenti eus sempri circau de fai, ma puru sighiri a offerri contributus originalis a is istudius in su campu de is scienzas socialis e umanisticas, cun d'un ogu de riguardu po s'America Latina e prus in generali po is Americas.

S'atra zona geografica de su mundu a sa cali est steti inderezzau s'interessu de «Ammentu» est su Mediterraneu e su Mundu Becciu. E a s'Europa, prus precisamenti a su Portugallu, est dedicau su Dossier publicau in custu numeru, intitulau *Comunidades estrangeiras em Lisboa (seculos XV-XVIII)* (Comunidade strangias in Lisbona), apariciu de Nunziatella Alessandrini e Jürgen Pohle. Unu Dossier chi arregollidit noi relazionis presentadas su 21de ennargiu de su 2015 a sa conferenza "Comunidades estrangeiras em Lisboa (seculos XV-VIII)", tenta a su Centru de Historia d'Aquèm e d'Alèm Mar da facultade de Ciencias sociales e humanas da Universidade Nova de Lisboa e dos Açores in d'uni programma de paricias conferenzias luso-italianas. Su *Workshop* precisamenti hat bofiu abrazzai un argumentu pagu connotu: cussu riguardanti sa presenzia de comunidadi strangias in Lisbona a s'epoca moderna. Su Dossier, infattis, trattat de impresarius, bancheris e negoziantis de tottu s'Europa chi si funt sistemaus in sa capitali arrica de su rennu de Portugallu, zittadi de sa cali funt partius cummercius fortunaus de giai de su seculu XIV, cun su sviluppu de sa bia atlantica, cun s'acciunta luegus, de s'acabu de su seculu XV, de is scambius cummercialis cun is quatturu Continentis.

Presentada